

# Jems

*Kiyi late tuma.*

Gwor siglow Jems re basrasem, re God rene omuteke habobem Juda tatame remne newopitim. God rene omuteke habobem Juda tatame rem remri nowsel mesegenen agerbo agerbo kwomke yin temenem, eker Jems re remne metkereke purerekene tuma remne basrasem. Re remne sikwur sakwur tuma remne basrasem.

Re remne op basrasem. Kem nowselri wos kap habote. Kem Satan rene wekrokte. Kem wule yenbowou nente. Kem Jisas rene omuteke habote. Kem tuma yenbowou wete. Kem ei kap negwote. Kem kemri kworer sig bukri kap wete. Kem Apiy God rekene tuma namrete. Etopkap tuma Jems re remne basrasen newopitim.

**Nemne be wos seilate, nem muresen teten nem Apiy rekene heyar temente.**

*(Sapta 1:1-18)*

*Jems reri basrasem siglow.*

<sup>1</sup> An Jems, an God reri, Haneyen Jisas Kraisi repri yaku nen tame. Kem Israelri letpeis tewo pes kere tame beig, kem Israel nowsel mesegenen agerbo agerbo nowselke yikwute yakwutem. An kemne pir wen kemne gwor siglow basrasbo.

*Seilabo wos rem nemne kitimena newobo.*

<sup>2</sup> Ari gesmase, metkereke yaper was kemne seilate, kem okbop tete. <sup>3</sup> Kem mettene, be yaper was kemne seilate, kem God rene omutekewai habote. Etopkap nentek, kemne seilabo was kem kebese teitkwunen taskurte. <sup>4</sup> Kem som muresen taskurte, kem limkene was heyar sete. Som taskuren yin kem tatame yenbo ten kem sespe tete tetane. Otkap kem yenbo ten kem be was wuri be merinte. Kemri wule et heyar yenbowai tete.

*Tatame rem purere yenbo merinte, rem God rene wemette.*

<sup>5</sup> Yike tame wuri re purere merinte, re God rene wemette, God re rene newote tetane. Rene wemetbo tatame God re remne nugwape was newote tetane. <sup>6</sup> Kem God rene wemette, kem omuteke habon ek wemette. Kem kap op habo op habote. Otkap tatame rem ok burowkap. Marye yan ok burow re tenebulan tanebulabokap, rem etopkap. <sup>7</sup> Otkap tatame rem kap op habote, God re remne was newote. <sup>8</sup> Er tatame remri wuribai pes tetane. Remri nenbo wule et kelow wuriwouke be yibo.

*Jems re wosbas bo tatamekene suwsagkene tatame remne basrasem tuma.*

<sup>9</sup> Wosbaskene bo tame re God rene omuteke habobo, rekene metekwaste. God re rene labo, re tame yenbo, re reri sig bukure webo. <sup>10</sup> Suwsagkene tame, God re reri sig teitkwunte, er tame re okbop tete. Tame re nugwape was potte habote, re walkwu yan keraket ten ek lekkwunbokap, suwsagkene tame rem etopkap tete. <sup>11</sup> Ekeya. Me walkwu yabel pasen agetage sok ten yerebokap, suwsagkene tame re tokwo

pot yakuwou nente, re yaper agetage etopkap tete tetane.

*God re nemne heyar nenbo, re nemne wule yaper be nente webo.*

<sup>12</sup> Metkereke yaper was tatame remne sailabo, rem heyar som sen taskurbo, rem metekwaste. God re kiyi wemkap, tatame rem rene pap yewobo, re remne sein heyar nente, rem heyar som temente tetane. <sup>13</sup> Tame re yaper was nente habote, re kap op wete. God re anne seilaye, an yaper was nentye. Yehow. Re etop kap wete. Yaper was et God rene be seilabo. God re tatame remne yaper was nente be seilabo. <sup>14</sup> Remne seilabo wule et gwopkap. Remri wuribaike rem was yaperwou nente habobo. <sup>15</sup> Tatame rem remri wuribaike rem yaper was nente habobo, sene rem yaper was ek nenbo. Eker, rem yaper was nugwape som nenen yibet, rem sate tetane.

<sup>16</sup> Ari gesmase yenbo, kem kap op habote, God re nemne yaper nente seilabo. Et me yikokobo tuma. <sup>17</sup> Was yenbokene was hadebaskene Hevenke yerbo. Lip, yabel, sow nenem God, re nemne was yenbowou newobo. Re wule yenbowou nenbo. Re agerbo be nente. <sup>18</sup> Eterri wuribaike re heyar habon tuma sekene wemke, nem reri tatame ek tem. Nem temnas yi tatamekap tem. Agerbo tatamekene agerbo woskene rem neremri kin yekwok tem.

**Nem God rene omutekewai  
habote, nem wule yenbowou  
nente.**

*(Sapta 1:19–5:6)*

*Nem tuma heyar meten nente.*

<sup>19</sup> Ari gesmase yenbo, kem op habote. Kem tuma agetage mette. Kem tuma agetage kap wete. Kem pap agetage kap yokte. <sup>20</sup> Pap yokbo tatame rem God reri wule yenbo be nenbo. <sup>21</sup> Kem wulare wulare wule yapersaper mesegente. Kem God reri kulke temente, reri kemri wuribaiké rasem tuma kem heyar habobet. Eter tumak et nene sene poten kem heyar tete.

<sup>22</sup> Kemri metem tuma kem etop nente. Kem wanwouke meten be nente, kem kworer me yikokobo. <sup>23</sup> Yike tame re God Reri Tuma meten be nenbo, re reri bitmi kworer oknelke labo tamekap. <sup>24</sup> Re reri bitmi lan re sene puboten yibo, reri laye bitmikap re agetage sene serbo. <sup>25</sup> Yike tame re God reri basrastene tuma heyar som sebet, re er tuma meten be serte, re heyar meten nenbet, wule yaper re er tame remne be keikerete. Be wos er tame re nente, God re rene kwobo late.

<sup>26</sup> Tame wuri re habote. An God rene omuteke habobo tame yenbo. An God reri sig bukrebé webó. Opkap tame re reri taule heyar be lakerebo, re kworer tuma yikokobo. Etopkap nenbo, reri omuteke habobo wule God reri sig bukrebé webó wule kelpe emik yibo. <sup>27</sup> God rene omuteke habobo tatame remri nenbo wule yénbowai sekene Apiy God re metekwasbo, re gwopkap. Rem yen kowenekene wane takene remne mapkap wos nenen rem mus metbo, rem remne kwobo labo. Rem nowselri wule amekwunen wule yénbowou nenbo.

## 2

*Nem aboyei tatame remne wule wuriwou nembet.*

<sup>1</sup> Ari gesmase, kem Haneyen Jisas Kraiss rene omuteke habobo. Re Hevenke tetane wos yenbo etemri haneyen. Eker kem tatame remne gwopkap wule kap nente. Kem sig bukri tetane tatame remne wule yenbo nenbo, sigkene bo tatame remne kem magel taibo. Kem etopkap wule kap nente. <sup>2</sup> Kap suwsagkene tame wuri re God rene lom yokwon keremkene wuriwouke wurte. Re kerap yenbo wolen akek wurte. Tame wuri re suwsagkene bo tame, re kerap yaper wolen akek wuren etek kirkir site. <sup>3</sup> Kap kem repne wule pes nente? Kerap yenbo woletene tame rene kem op wete. Setate, ne gwor wolbaye yenbok site. Kap kem suwsagkene bo tame rene op wete. Ne op yokwok tete, o ne neremri tewo tobok yan selke si. <sup>4</sup> Kem opkap wule nente, et kem keremri wuribai yaperke agerbo tatame remne se pebo. Kem heyar be habon tatame remne wule wuriwouke be se pebo. Yehow. Tatame remne se pebo tame, rem etemri wuribai yaperke se pebo.

<sup>5</sup> Ari gesmase yenbo, kem wan tai. God re op wem. Nowselri wosbaskene bo tatame rem anne omutekewai habote tetane. An kiya wemkap, anne omuteke habobo tatame rem ari panen sitene kwomke yin heyar somsom temente. Eker an wosbaskene bo tatame remne lebam, rem ari kwomke yan temente. <sup>6</sup> Kerem, kem wosbaskene bo tatame remne wule yaper nenbo. Kem habote. Yike kemne wule yaper nenbo? Yike kemne tuma nenbo? Wosbaskene bo tame rem kemne etep be

nenbo. Yehow. Suwsagkene tame etem kemne etepkap nenbo. <sup>7</sup> God re Jisas Kraiss reri sig yenbo kemne newom. Yike er sig yenbo tame kuyebo? Suwsagkene tame etem rem etop nenbo.

<sup>8</sup> God re neremri Keryen Yen. Reri siglowke re nemne wule wuri newom. Er wule re op webo. Kem kworer wesom heyar nenbokap, kem agerbo tatame remne kirkir heyar etop nenbet. Er wule et Keryen Yen eterri wule. Kem er wule heyar tobote, kem wule yenbo nente. <sup>9</sup> Kem tame wuri rene wule yenbo nente, agerbo tame rene magel taite, opkap wule et kem wule yaper nenbo. Opkap nente, kem God reri wule biragiyebo. <sup>10</sup> Tame wuri re wule aboyei tobobo tame, re wule wuri biragiyete, et re wule aboyei biragiyebo. <sup>11</sup> Nem mettene, God re op wem. Kem muye bisi mare bisi mane yite. Sene re op wem. Kem alwo pi kap pete. Tame re muye bisi be yite, re alwo pi pete, er tame re wule biragiyebo. <sup>12</sup> Kem heyar habote. God eterri wulek re kemne yaper nen wos saukrasem. Eter wulek re kemri webokap, kemri nenbokap se pete tetane. Eker kem wule yenbori kulke wuren tuma yenbowou webet, wule yenbowou nenbet. <sup>13</sup> Pap be metbo tatame remne God re se pete, re remne pap be mette tetane. Pap metbo tatame remne God re se pete, re remne pap sein mette tetane. Pap metbo wule et se pebo wule teitkwunbo.

*God rene omuteke habobo tame re wule yenbo be nente, reri habobokap et kelpe emik yite.*

<sup>14</sup> Ari gesmase, tame wuri re op wete. An Kraiss rene omuteke habobo. Sene re wule yenbo be

nenbo. Opkap tame God re rene mapurke potte? Buposubuwai. <sup>15</sup> Kap God rene omuteke habobo gesmase remri tame oub yaper, o rem awos be temente, <sup>16</sup> kem remne op wete. Setate. Kem pap kwoye met. Kem yin tame oub poten wute, kem yin awos poten an se kette. God re kemne kwobo late. Kem op wen remne wos be newote, kemri webo tuma remne kwobo mapurke late? <sup>17</sup> God rene omuteke habobo wule re gworkap. Tatame rem God rene omuteke habobo, rem wule yenbo kirkir be nenbo, remri omuteke habobokap et kelpe emik yibo.

<sup>18</sup> Kap tame wuri re yan op wete. Ne omuteke habobo, an wule yenbo nenbo. Op wete tame an rene sein op wete. Ne webo, ne omuteke habobo. Neri omuteke habobo wulekene wule yenbo ne be nenbokene ne anne peterate. An nene ari omuteke habobo wule peterate. Ari nenbo wule yenbo ne late, ne sanete, an Krai rene omuteke habobo. <sup>19</sup> Ne omuteke op habobo. God eterwou re wuriwou tetane. Ne op habobo, et yenbo. Arkwu gambo etem mere, rem etop omuteke habobo, rem aken polpolbo. <sup>20</sup> Ne wor tetane tame! Ne God rene omuteke habon yenbo wos be nenbo, neri omuteke habobokap et kelpe emik yibo. An nene omuteke habobo wule heyar wesowte nenbo.

<sup>21</sup> Nemri warege Abraham, re God reri tuma omuteke meten re reri yen, Aisak, rene kwar pebo tiyke rasen pen sate nenem. God re Abraham reri nenem wule yenbo lam, re Abraham rene tame yenbo wem. <sup>22</sup> Kem heyar habote. Abraham reri God rene omuteke habobem wulekene

neri nenem wule yenbokene rep yaku wuriwouke nenem. Abraham re op nenem, reri omuteke habobem wule re yenbowai sekene tem. <sup>23</sup> God Reri Siglowri Tuma op webo.

Abraham re God rene  
 omuteke habobem, eker  
 God re rene tame yenbo  
 wem. (Stat 15:6; 2 Stori 20:7; Aisaia 41:8)

God re Abraham rene wem. Re areri nowu. Et tuma sekene tem. <sup>24</sup> Kem sanetene. Tame re God rene bupo me omuteke habobo, re wule yenbo kirkir be nenbo, God re rene op be wete. Ne tame yenbo. Yehow. Tame re God rene omuteke habon wule yenbo kirkir nenbet, God re rene op wete. Ne tame yenbo.

<sup>25</sup> Kiyi temenem mare bisi yibem ta, Rahap, te etopwou nenem. Te wule yenbo nenem. Juda tame rep kase late yim, te repne heyar berasen agerbo kelowke werasen yim, peiktame rem repne be pem. Op nenem, God re tene ta yenbo wem. <sup>26</sup> Sabo tatame remri wesom et wou be tetanekap, God rene omuteke habobo tatame, rem wule yenbo kirkir be nenbo, remri omuteke habobo wule et sa tamekap.

### 3

#### *Nem nemri gwusi taule heyar lakerete.*

<sup>1</sup> Ari gesmase, kemri nugwape tame rem God Reri Tuma peikbo tame tete kap habote. God reri tatame remne se pete yabel re tuma peikbo tame nemne heyarwai se pete tetane. <sup>2</sup> Nem aboyei nem rane wos heyar be habobo, nem wor ten yaper nenbo. Tame re be tuma wete, re kiyi heyar



habon tuma yenbowou ek webo. Opkap tame re tame yenbo. Reri wesom kirkir re kebese lakerebo. <sup>3</sup>Nem ain eisow poten hos por reri tumaske rasen peikbo, re nemri webokap ek nenbo. Nem mak yite wete, hos re etek yite. <sup>4</sup>Kem sip kirkir habote. Sip rem sikabe wos. Sip kerepiti peteyabo wos et eisow wos. Marye yabo, ok burow re sip rene poten sen yibetbo. Sip mutame re agerbo emik yite selbo, re er kerepiti peteyabo wos sene kerepiti peteyate, sip re kebese etek yibo. <sup>5</sup>Etopkap, tatame remri gwusi taule et eisow wos. Er gwusi taule repri nenbokap rep kworer gabobo.

Kem habote, tame rem guwb taimute, er ker re ein bukre tete, nugwape guwb aboyei kebese ein pekate. <sup>6</sup>Gwusi taule et ker taulekap wos. Re metkereke yaper wos nemri wesomke liskerebo. Re sene bukri ten nugwape emik ein yibo. Er ein yibo emi et yaper tebo. Er ker re ker kwomke yam. <sup>7</sup>Agerbo agerbo boulri wos, portob, omap, mogworwase, kworwoale, tame rem remne poten awos newon abo. Rem etemri kulke tetane. <sup>8</sup>Tame rem remri gwusi taule kebese be keikere yakerebo. Gwusi taule re yaper saper tuma webo. Rene mapurke sewaite? Re tame tabo biyirka. <sup>9</sup>Gwusi taulek nem Keryen Yen God, nemri Apiy God, rene wese abo. Sene eter gwusi taulek nem God reri eterkap nenem tatame remne suwyogu wurabo. <sup>10</sup>Tumas wuriwouke nem tuma yenbokene tuma yaperkene ek webo. Ari gesmase, nem etopkap kap nente. <sup>11</sup>Ok sekbo emi et ok yenbokene ok yaperkene rep wurik be sekbo. Yehow. <sup>12</sup>Ari gesmase, wate nawobek base supa kebese

be yate. Keibi nawobe kirkir wate supa kebese be yate. Kersepkap okke nem ok yenbo be tite.

*Tame re purere yenbo tetane, re wule yenbo nenbo.*

<sup>13</sup> Kemri tame wuri re purere wuribai yenbo temente? Er tame re reri nenbo wule yenbo tegek kap wesowsapte. Wule yenbo rem elen me nenbo, rem sig yenbo kworer be wete. Nem etop late, nem metbo, rem porerekene. <sup>14</sup> Kem agerbo tatame remne wuribai yaper habobo, o remne pap yokbo, o remne gesa tebo. Er wule yaper kem kap kworer gabote. Opkap et kem me yikokobo. Yikokobo tuma re tuma sekene kap teitkwunte. <sup>15</sup> Opkap wuribai purere et yaper. Et Hevenke yabo purere bo. Et nowselri purere. Et Satan eter newobo purere. <sup>16</sup> Metye. Tatame rem agerbo tatame remne yaper habon gwule tebo, o kworer habobo, er tame rem heyar be site. Rem etop nenbo, rem agerbo agerbo wule yaper kirkir nenbo. <sup>17</sup> Tatame rem God reri newobo purere wuribai potbo, rem gwopkap nenbo. Rem yenbosubuwai tetane. Rem gwule be tebo. Rem elen me tebo. Rem mangure be tebo. Rem tatame remne pap metbo, rem remne yenbowou nenbo. Nem remne wule pes be nenbo. Rem yikene wule yaper be nenbo, rem remne aboyei wule yenbowou nenbo. <sup>18</sup> Gwule kelmenabo tatame rem nowke wos nanekwobo tamekap. Tame rem now wos nanekwon yuri supa kutebokap, gwule kelmenabo tame rem gwule kelmenabo, yuri tatame rem heyartemente.

## 4

*Nowselri wule nenbo tatame rem God eterri peiktame.*

<sup>1</sup> Berke kem awosein awosein gwule ten ei naibo? Kem was potte wuribaikke tebo, eker kem awosein awosein gwule ten ei naibo. <sup>2</sup> Kem was potte selbo, kem be potbo, eker kem tame pen sate selbo. Kem was ayekutebo, kem be potbo, eker kem ei negwon naibo. Kem God rene be wemetbo, eker kem was be potbo. <sup>3</sup> Kem wemetbo, kem be potbo. Kem poten yaper was nente habobo. Eker God re kemne be newobo. <sup>4</sup> Kem God rene mesegenbo, kem ta te tame rene mesengen mare bisi yibo takap. Metye. Nowselri wule sebo tatame rem God eterri peiktame. Yike rem nowselri wulewou kep pete selbo, rem God eterri peiktame. <sup>5</sup> God Reri Siglowri Tuma op webo. God re nemne wow newom, er wow re nowselri was kenakem habobo. Kem map habobo? God re er tuma bupo me webo o?

<sup>6</sup> God re nemne pap meten kwobo labo wule nugwape newobo. God Reri Siglowri Tuma op webo.

Kworer be habobo tatame,  
 God re remne pap meten  
 kwobo labo.

Kworer gabobo tatame, God  
 re remne teitkwunbo.

(Gutpela Sindaun 3:34)

<sup>7</sup> Eker, kem God eterri kulke wuren tete. Kem Satan rene nasweyen sewaite, re kemne mesege-nen amen yite. <sup>8</sup> Kem God rene meknik yin tete, God re kemne mekniwaike yan tete. Tatame rem

let ok keyabokap, wule yaper nenbo tatame kem wuribai yenbo pot. Wuribai pes tetane tatame, kem wuribai yaper mesegen. <sup>9</sup> Kem mokwo sin kirate. Kem sak sene kap keyete, kem mokwowou sibet. Kem okbop sene kap tete, kem pap yaper ten kirabet. <sup>10</sup> Kem Keryen Yen reri tewo tobok yan gulke pate. Op nente, re kemne nenewayen teteruwen kemne sig yenbo wete.

*Kem gesmase remne kap se pete.*

<sup>11</sup> Ari gesmase, kem God rene omuteke habobo gesmase remne tuma kap kukwonte. Gesmase remne tuma kukwonbo tame rem gesmase remri nenbo wulekap kirkir se pebo. Op nenbo tame, rem God reri wule yenbo kirkir se pebo. Op-kap tame rem God reri wule yenbo be sebo. Yehow. Rem er wule yenbo ab se pebo. <sup>12</sup> Wule yenbo newobo tame, wule se pebo tame wuriketwou tetane. Et God eter. Eterwou re tatame remne sene potbo o re remne pen sabo. Kemri agerbo tatame remne se pebo wulekap, et God reri yakukap kem potbo.

*Kem taule kap kutete.*

<sup>13</sup> Rane kem op webo. Wore o yuwu nem agerbo kwomke yin nabe wuri nem yaku etek nenen tokwo nugwape potte. Op webo tame, kem ari tuma met. <sup>14</sup> Worek tete woskap, kem be sanetene. Tatame kem gwankap. Gwan et sou be tebo. Keni gwan kitbo, kerakap tebo, sene gwan berabo. Tatame kem etopkap. <sup>15</sup> Kem gwopkap wete, et yenbo. Haneyen re kirkir wete, nem etek yin ten yaku ek nente. Op wete, et yenbo. <sup>16</sup> Kem opkap be webo. Yehow. Kem kemri sig bukure wen kworer

gabobo. Et yaper. <sup>17</sup> Kem heyar habote. Wule yenbo sanebo tame re er wule yenbo be nente, re wule yaper nenbo.

## 5

### *Suwsagkene tame rem yaper tete tetane.*

<sup>1</sup> Kem suwsagkene tatame, kem heyar met. Yaper wos kemne tete tetane, kem kiran taye pitte. <sup>2</sup> Kemri nugwape wosbas aboyei kupa tem. Kemri tame oub kesewule rem aboyei regyewom. <sup>3</sup> Golkene silvakene kupoksemaukke mauktene. Er kupoksemauk re kemri wule yaper nemne peterabo, kemri wesom kerke eikap eite tetane. Yuri rem yaper tete tetane. Jisas re sene yate yabel matnayek, kem nugwape wosbas bupo me tupan akek ek rastene. <sup>4</sup> Metye. Kemri now yaku nenbo tame remne kem yikokon tokwo tep keikerem. Kemri keikerem tokwo tep rem tebo. God re kemne yaper sein nente. Now yaku nenbo tame remri kera taye Kitimena Bukre Tetane Keryen Yen re metem. <sup>5</sup> Kem nowselke tetane, kem wosbas yenbo kanbo nugwape tetane, kem nowselri wule okbop tebo. Kem awos nugwape an wes me gergerbo porkap tetane. Kemne pen sate yabel tete nenbo. <sup>6</sup> Kem wule yenbo nenbo tatame remne tuma nenen pen sabem. Kem op nenbem, rem kemne be sewaibem. Rem kemne sein be naibem.

**Nem kitimenakene ten God  
rekene tuma namren Haneyen re  
sene yate yabel kowte.**

*(Sapta 5:7-20)*

*Nem kitimena poten taskuren Haneyen reri sene yate yabel kowte.*

<sup>7</sup> Ari gesmase, kem kitimena poten taskuren Haneyen reri sene yate yabel heyar kowte. Kem labo, now nenbo tame rem heyar kowbo tame. Kiyi rem wos nanekwobo. Sene rem mowkene yabelkene kowbo. Mou tibo, yabel pasbo, yuri er wos rem okwobo, rem poten ek abo. <sup>8</sup> Etopkap, kem taskuren elen kowte. Haneyen re sene yate matnaye.

<sup>9</sup> Ari gesmase, kem awosein awosein gwule kap tete, tuma kap kukwonte. Tatame remne Se Pete Tame re opkap tatame remne yaper sein nente tetane. Metye. Er Se Pete Tame re eruk tetetane.

<sup>10</sup> Ari gesmase, kem God reri kiyi tuma wesowbem tame remri nenbemkap habote. Rem Haneyen reri sigke tuma wesowbem, tatame rem remne yaper nenen rem mus bukrene meten taskurbem. Kem etop nenbet. <sup>11</sup> Nem op webu. Tatame rem me taskurbo, rem metekwasbo tatame. Kem Jop reri nenemkap mettene. Re mus bukrene meten taskurbem. Sene Keryen Yen God re rene heyarem. Ekeya. Keryen Yen re let papkene tame, re tatame remne pap meten heyar nenbo tame.

*Kem kap puromote.*

<sup>12</sup> Ari gesmase, tuma bukrene an kemne wete nenbo. Kem warege kap puromote. Kem warege puromote wete, nelri wos o nowselri wos o agerbo wos mane puromote. Kem ekeya wete, kem ekeyawou wen nente. Kem yehow wete, kem yehowou wen nente. Kem etopwou nente, God re kemne tuma be wete.

*God rekene namrebo tuma et kitimenakene.*

<sup>13</sup> Be yaper vos kemri tatame remne temente wete, er tatame rem Apiy God rekene namrete. Kemri tatame rem boteyatete wete, er tatame rem God rene sekwo yenbo lomen reri sig bukrebewebet. <sup>14</sup> Ta o tame sikanuma nenmente wete, re God rene omuteke habobo tatame remri keryen yen remne wen yate. Rem rekene sin Haneyen reri sigke sikanuma nen tame rene kwar kere-ruwen God rene wemette, re er tame rene kwobo late. <sup>15</sup> Rem God rene omuteke wemette, er sikanuma sene boite. God re rene kitimena newote, er tame re sene kwuye mette. Reri nenbem yaper vos, God re poten septin rene tuma be wete. <sup>16</sup> Kem kwuye mette selbo? Op selte, kemri nenbo yaper vos kem God rene omoteke habobo gesmase remkene awosein awosein wesowen remkene awosein awosein habon Apiy God rene wemetbet. Op nente, sikanuma sene boite. Tatame yenbo remri God rekene namrebo tuma et kitimenakene tuma, et tatame remne kwobo late. <sup>17</sup> Elaija re neremkap more tame temenem, re God rene omuteke op wemetbem. Mou kap tite. Op wemetbem, God re mou tite sewayem, nabe tep wuri wiywiy mur mou be tim. <sup>18</sup> Sene re God rene mou tite wemetemke, mou ek sene tim. Mou tim, awos sene heyar rekwan yam.

*Tame re God rene mesegente wete, nem rene sene panen yate.*

<sup>19</sup> Ari gesmase, kemri wuri re God reri wule sekene mesegente, God rene omuteke habobo agerbo tame re rene sene kwobo lan re God reri wule sene sete, <sup>20</sup> er tame re wule yenbowai

nenbo. Kem heyar habote. Tame re yaper wos nenbo tame rene kwobo lan re wule yaper mesegenen God rene sene lasyate, er tame re reri wow sene potbo. Eker re be sate, re heyar som temente. Etopkap wulek God re nugwape yaper nenbem wule ab poten septite.



**God Reri Teiktem Tuma Ager  
The New Testament in the Yamano Dialect of the  
Yessan-Mayo Language of Papua New Guinea  
Nupela Testamen long tokples Yssan-Mayo Yamano  
long Niugini**

copyright © 1980, 2004 Lutheran Bible Translators

Language: Yessan-Mayo (Yamano) (Yessan-Mayo)

Dialect: Yamano

Translation by: Lutheran Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 22 Feb 2024 from source files dated 31 Aug 2023

61a6ffd9-3aa5-58b7-982d-b5ada9490557